

之德爰錫土田日碑善養之功真堪宰相即召公入掌三事外司  
百揆調飪鼎寶緝熙帝繇夷吾果理於高後咎單謚暢於伊尹帝  
曰若予邠之後亮采惠疇僉曰元祐帝曰俞咨祐汝作小司空兼  
攷牧圉李公言成允令才實允宗恪居本朝能率大夏載習載步  
穉之秣之䟽穢鎮浮受剗聽訟匪燒匪剔斯馬斯材荷天之寵未  
可涯也判官尚乘奉御長孫勛壽安尉賀蘭弼華陰主簿常翼並  
心懸規鏡家韞賜書投刃靡全應機立斷侶昌門之驂乘行翼聖  
僊諧子況之能官坐登卿相有原迓浦非大而何雅所謂愷悌君  
子干祿愷悌信矣先是國家以岐山近甸鹵土晚寒寧州壤甘涇  
水流惡澤茂豐草地平鮮原當古公走馬之郊接非子犬丘之野  
度其四鏡分署八坊其五在岐其餘在三郡保樂第一蘇忠主之  
甘露第二劉義尸之南普潤第三田敬董之北普潤第四邵業監  
之岐陽第五李行守之太平第六馬慶尹之宜祿第七曾徽領之  
安定第八李仙正之八人者或折衝禦侮或果毅昭戎射馭不違